



Kingusinnerpaamik UKA2019-imi inuussutissarsionermik siuarsaanermik aaqqissuussinerit maanna ingerlasut nalilersorneqarnerannik Naalackersuisut saqqummiussinissaat pillugu Inatsisartunut aalajangiiffigisassatut siunnersuut. Nalilersuinermi aaqqissuussinerit maanna ingerlasut suliffeqarfinnik suliaqarfinnillu nutaanik qanoq annertutigisumik siuarsaanerat qulaajaavigineqassaaq. Nalilersuinermilu namminersorlutik inuussutissarsiortunut manna sinaakktissatut atugassarititat ilanngunneqassapput, maannalu aaqqissuussinernut kiisalu manna tikillugu misilittagaareersut tunuliaqutaralugit sinaakktissanut aaqqiissutaasinnaasunillu pitsanngorsaatinillu siunnersuusiortoqarluni. Nalilersuinermik suliaqarnermi namminersorlutik inuussutissarsiortut qanimut suleqatigineqarnissaannik Naalackersuisut kaammattorneqarput.

(Inatsisartuni ilaasortaq Múte Bourup Egede, Inuit Ataqatigiit)

(Siullermeerneqarnera)

Aallaqqaammut Inatsisartunut ilaasortaq Mute Bourup Egede aalangiiffigisassatut siunnersuutaa pillugu qutsavigerusuppara.

Demokraatiniit upperaagut namminersorlutik suliffiutillit taakuummata siuariartortitsisussat atugarissaartitsisussallu. Namminersorlutik inuutissarsiortut ineriartortinnerisigut inuiaqatigiinni pigissaarneruneq pilersinneqartussaavoq. Taamaattumik politikerit uagut sinaakktissanik pisariaqartinneqartunik patajaatsunillu pilersitsisussaavugut, inuutissarsiortut suliassaat pingaarnerit ilaatigut ukuusut, tunisassiullaqqissinerunissaq aammalu unammillersinnaassuseqarnerulernissaq angusaqarfigeqqullugit. Avaqqussinnaangilarpulli ineriartorneq pissammat pisortat namminersortullu qanimut suleqatigiinnerisigut.

Tassunga atatillugu eqqaamassallugu pingaaruteqarpoq nunarput pigissaarmat. Ilaannikkut eqqarsartarpunga puigortaripput, qanoq atugarissaartigaluta pigissaartigalutalu. Imartagut aalisakkanik qaleralinnillu ulikkaarpoq, aatsitassaateqarluarpugut aammalu pinngortitarsuarmik avatangiiseqarpugut nalissaqanngitsumik, immikkuullarissumik kusanartorsuarmillu. Tamakku pisuussutit pinngortitap tunniussinnaasaasa aalisakkat, aatsitassat takornariaqarnerullu periarfissaqartippaatigut aningaasarsiorluarnissatsinnut. Tamakkuninnga atuillaqqissinerusariaqarpugut, immikkoortuni taasanni iluatsitsigutta sullivinni allani iluatsisoqartussaammat, iluatsitsiffiusut inuutissarsiutit nassatarisussaammassuk nutaanik allanik pilersitsisoqarnera.

Taamaattumik pisortat nunatsinni nassaarniallaqqissunut isumassarsiullaqqissunullu aporfilersuissanngillat. Paarlattuanik pisortat sinaakktit malittarisassallu pitsaasut aqutugalugit pilersissavaat inuutissarsiuteqarneq nutaaliornermik ikorfartuisoq aammalu sulliviit taasama iluini isumassarsianut ikorfartuisoq taamatullu allani tamani. Inuutissarsiortut namminersortut pisariaqarluinnarput siuariartortoqarnissaanik atugarissaarnissamillu kissaateqarnerput piviusungussappat. Ilungersoqqaartariaqarpugulli.



Namminersorlutik suliffiutillit pikkoriffigisaminnut ingerlatsinissaannut kiffaanngissuseqartittariaqarpagut, suliffissanik pilersitsisinnaaqqullugit, pilersitsisinnaaqqullugit atugarissaarnermik kiisalu siuartornermik. Piarissersorneqassanngillalli paasiuminaatsunik aamma allaffissornikkut suliniutinik pisariaqanngitsunik. Paarlattuanik sulliviit naleqqussarneqassapput, akileraarusersorneqassapput ikorfartorneqarlutillu sapinngisamik minnerpaamik.

Siunnersuuteqartup manna siunnersuutini aqqutigalugu kissaatigaa inuutissarsiutinik siuarsaanissamut aaqqissuussinerit atuuttut nalilersoqqinneqassasut. Demokraatini tamanna tapersersornartutut isigaarput, nalilersuisinnaaniassagatta best practise atorlugu - imaluunniit allannguissanerluta.

Inuutissarsiornermut Ataatsimiititaliami siunnersuutip sukumiisumik suliarineqarnissaa innersuupparput.